

**GWEINIDOGION Y DU SY'N GWEITHREDU MEWN MEYSYDD
DATGANOLEDIG**

**171 - Rheoliadau Cyd-drefniadaeth ar gyfer y Marchnadoedd mewn
Cynhyrchion Amaethyddol (Cyrff Cynhyrchwyr a Gwin) (Diwygio etc)
(Ymadael â'r UE) 2020**

Dyddiad gosod yn Senedd y DU: 5 Hydref 2020

Sifftio

A fydd angen eu sifftio yn Senedd y DU?	Na fydd
Gweithdrefn:	Cadarnhaol drafft
Dyddiad trafod gan Bwyllgor Offerynnau Statudol Ewropeaidd Tŷ'r Cyffredin	Amherthnasol
Dyddiad trafod gan Bwyllgor Craffu ar Is-ddeddfwriaeth Tŷ'r Arglwyddi	Amherthnasol
Dyddiad y daw'r cyfnod sifftio i ben yn Senedd y DU	Amherthnasol
Datganiad ysgrifenedig o dan Reol Sefydlog 30C:	Papur 36
Memorandwm Cydsyniad Offeryn Statudol o dan Reol Sefydlog 30A (oherwydd ei fod yn diwygio deddfwriaeth sylfaenol)	Nid yw'n ofynnol

Gweithdrefn graffu

Canlyniad y broses sifftio	Amherthnasol
Gweithdrefn	Cadarnhaol drafft
Dyddiad trafod gan y Cydbwyllgor ar Offerynnau Statudol	Anhysbys
Dyddiad trafod gan Bwyllgor Offerynnau Statudol Tŷ'r Cyffredin	Anhysbys
Dyddiad trafod gan Bwyllgor Craffu ar Is-ddeddfwriaeth Tŷ'r Arglwyddi	Anhysbys

Sylwadau

Bwriedir i'r Rheoliadau hyn gael eu gwneud gan Lywodraeth y DU yn unol ag adran 8(1) o Ddeddf yr Undeb Ewropeaidd (Ymadael) 2018 ("y Ddeddf Ymadael"), a pharagraff 21 o Atodlen 7 iddi.

Mae'r Rheoliadau hyn yn ymdrin â maes polisi Cyd-drefniadaeth ar gyfer y Marchnadoedd Amaethyddol ("CMO"), sef y fframwaith ar gyfer mesurau'r farchnad ac ymateb i argyfwng yn y farchnad yn y sector amaethyddol, y darperir ar ei gyfer o dan y Polisi Amaethyddol Cyffredin ("PAC"). Mae Deddf yr Undeb Ewropeaidd (Ymadael) yn trosi cyfraith yr UE sy'n ymwneud â'r cyd-drefniadaeth ar gyfer y marchnadoedd ar ddiwedd y cyfnod pontio yn gyfraith ddomestig ("cyfraith yr UE a ddargedwir"), ac yn ei diogelu. Mae'r offeryn hwn yn gwneud y cywiriadau priodol i gyfraith yr UE a ddargedwir i sicrhau y bydd rheolau'r cyd-drefniadaeth ar gyfer y

marchnadoedd yn gweithredu'n effeithiol ar ddiwedd y cyfnod pontio. Mae'r diwygiadau hyn yn cynnwys cywiriadau i Offeryn Statudol Ymadael â'r UE blaenorol. Mae datganiad Llywodraeth Cymru, dyddiedig 7 Hydref 2020, yn nodi mai dull Llywodraeth y DU wrth ddiwygio cyfraith yr UE a ddargedwir fu sicrhau bod deddfwriaeth yn parhau mor agos at y system bresennol â phosibl, a bod y newidiadau a wneir gan y Rheoliadau hyn yn dechnegol o ran natur i raddau helaeth.

Mae'r Rheoliadau hyn yn gwneud nifer o newidiadau:

- maent yn dirymu rheolau'r cyd-drefniadaeth ar gyfer y marchnadoedd sy'n ymwneud â grwpiau cynhyrchwyr trawswladol, na fyddant bellach yn berthnasol yn y DU ar ddiwedd y cyfnod pontio;
- maent yn sicrhau bod rheolau'r cyd-drefniadaeth ar gyfer y marchnadoedd sy'n ymwneud â sefydliadau cynhyrchwyr domestig yn parhau i weithredu, gan atal amwysedd neu aflonyddwch i randdeiliaid yn y sector hwn; ac
- maent yn darparu ar gyfer gwinoedd i sicrhau bod trefniadau ar gyfer amddiffyn a chanslo Enwau Tarddiad Gwarchodedig a Dangosyddion Daeryddol Gwarchodedig yn parhau i weithredu ar ddiwedd y cyfnod pontio.

Mae'r Gwasanaethau Cyfreithiol wedi adolygu datganiad Llywodraeth Cymru, dyddiedig 7 Hydref 2020, a'r Memorandwm Esboniadol i'r Rheoliadau.

Mae'r Cynghorwyr Cyfreithiol yn gwneud y sylwadau a ganlyn mewn perthynas â datganiad Llywodraeth Cymru, dyddiedig 7 Hydref 2020, ynghylch effaith y Rheoliadau hyn.

1. Mae swyddogion Llywodraeth Cymru o'r farn bod Rheoliadau 2020 yn cynnwys darpariaethau sydd o fewn cwmpas cymhwysedd deddfwriaethol y Senedd, ac felly ni ddylid rhoi'r swyddogaethau cysylltiedig i'r Ysgrifennydd Gwladol yn unig. Mae DEFRA o'r farn bod diwygiadau yn Rheoliadau 2020 yn ymwneud â materion a ddargedwir. Ar y sail hon, mae DEFRA yn bwriadu trosglwyddo swyddogaethau amrywiol i'r Ysgrifennydd Gwladol. Yn y Memorandwm Esboniadol i'r Rheoliadau, mae'n nodi:

“Defra has engaged the Devolved Administrations on its approach to CAP legislation under the European Union (Withdrawal) Act 2018, including on this instrument, to familiarise them with the legislation ahead of laying. Defra has engaged with the Devolved Administrations during the drafting of this instrument.”

Mae Gweinidogion Cymru wedi ysgrifennu at Lywodraeth y DU i fynegi ein barn, sef nad yw'n briodol i Weinidogion Llywodraeth y DU yn unig

benderfynu ar faterion sy'n effeithio'n uniongyrchol ar feysydd lle y mae cymhwysedd wedi ei ddatganoli ac nid oes bwriad gan Weinidogion Cymru yn unig roi cydsyniad ar gyfer yr Offeryn Statudol hwn.

2. Heblaw am gyfeirio at amaethyddiaeth a'r PAC, nad ydynt yn faterion a gedwir yn ôl o dan Ddeddf Llywodraeth Cymru 2006 ac sydd felly wedi'u datganoli, nid yw datganiad Llywodraeth Cymru yn nodi pa rai o bwerau deddfwriaethol penodol y Senedd neu bwerau gweithredol Gweinidogion Cymru sy'n cael eu heffeithio gan yr offeryn hwn. Mae cynghorwyr cyfreithiol yn argymhell y dylid gofyn am eglurhad ynghylch pa bwerau datganoledig yr effeithir arnynt.

Mae'r crynodeb uchod a chynnwys y Memorandwm Esboniadol i'r Rheoliadau hyn yn cadarnhau eu heffaith.

Mae Cynghorwyr Cyfreithiol yn tynnu sylw'r Pwyllgor at y materion canlynol mewn perthynas â pharagraff 8 o'r Memorandwm ar Fil yr Undeb Ewropeaidd (Ymadael) a Sefydlu Fframweithiau Cyffredin ("y Memorandwm"):

- Safbwynt Llywodraeth Cymru yw bod amaethyddiaeth a'r PAC yn faterion sydd wedi'u datganoli ac nad ydynt yn faterion a ddargedwir o dan unrhyw bennod yn Atodlen 7A i Ddeddf Llywodraeth Cymru 2006. Fodd bynnag, nid yw Llywodraeth y DU yn cytuno, ac mae o'r farn bod pwnc Rheoliadau 2020 yn un a ddargedwir. Felly, nid yw Llywodraeth y DU wedi gofyn am gydsyniad Gweinidogion Cymru.

- Mae Llywodraeth Cymru o'r farn bod y swyddogaethau uchod yn ymwneud ag amcanion y CMO i wella cynhyrchiant y sector amaethyddol a thrwy hynny wella cystadleurwydd cynnyrch cynradd yn y farchnad. Mae pwnc amaethyddiaeth a'r PAC o fewn cymhwysedd deddfwriaethol Senedd Cymru (hynny yw, mae wedi ei ddatganoledig). O dan delerau'r Cytundeb Rhynglywodraethol, dylid bod wedi gofyn am gydsyniad Gweinidogion Cymru cyn gosod Rheoliadau 2020.

Gan ei bod yn aneglur o ddatganiad Llywodraeth Cymru, dyddiedig 7 Hydref 2020, pa effaith benodol y gall y Rheoliadau ei chael ar gymhwysedd deddfwriaethol y Senedd a/neu gymhwysedd gweithredol Gweinidogion Cymru, nid yw'r Cynghorwyr Cyfreithiol wedi gallu gwneud rhagor o asesiadau ynghylch a oes unrhyw faterion arwyddocaol yn codi o dan baragraff 8 y Memorandwm mewn perthynas â'r Rheoliadau hyn.